

富平縣志

函一
十册
函

富平縣志稿卷五

人物

忠節孝義理學儒林史法必書十室必有忠信况一邑之
大材傑倍出或樹聲稱或著勳績與前賢媲美爲後學所
瞻依間有浮沉鄉里混跡屠販或乘時會立功名史謂附
青雲之士著聲施於後世者次則六行任卹孝友嫻睦是
知分財周急合天心人性之善也富平風氣獨厚好行其
德或助賑卹災全婚育嬰養老拯飢造橋築陂捐義學書
院凡所設施遠至數百年猶炳諸紀載是可以勸善矣嗚
呼若拔毛利天下不爲思封殖以遺子孫又豈能長據有

哉曷若流光志乘爲後世法其仁與智可深思焉

古書左圖右史史例無圖而有表表亦圖也圖有準望分
率之法表有旁行邪上之例雖無文字條理秩然故圖表
傳志四者缺一不可近代方志家多詳志傳而略於圖表
方位道理非圖則廣輪不明沿革紀事職官選舉非表則
經緯不具古稱方志爲圖志一曰輿圖今首圖次表次志
次傳悉如史例

地志爲史氏之流別方志列傳卽師史意而人物具焉唐
書陳留人物志此外各家載籍則有耆舊傳先賢傳名賢
傳富平人文輩出流風未墜儒林名宦文學忠節孝義武

略善行耆壽流寓方外彙爲一冊俾前賢徽音未遠式閭
表墓庶興起焉

名臣

古之爲大臣者正色立朝有犯無隱定其謀而灼有可建
之功竭其力而實有可著之效爲百世興無疆之利自審
有素得君則施之事功垂裕後世卽二三宵小讒賊間興
一身之大節挺挺不爲屈撓斃刀白刃亦甘之如飴其身
雖殞其名常存

孝行

士有百行以孝爲先未有不能事親而能事君者語云求

忠臣於孝子之門有以哉冬溫夏清昏定晨省此固人生庸行之常然卽此以觀其人亦可知其品誼矣

忠節

事君能致其身臨大節而不可奪是指在位者言之耳若生未膺微祿斗粟或激義憤或切同仇白刃可蹈殺身成仁氣凌霄漢光並日星立萬古之綱常作千秋之人極享俎豆蒸嘗於一鄉判泰山鴻毛於俄頃化爲猿鶴聲播閭閻祀茲英靈留光志乘

名宦

設若以官學優則仕凡臨民者必深思焉古人以愛利爲

懷漢時循良著蹟達官鉅職固無論矣下而令尹丞尉亦當勤求民隱除弊興利鋤莠安良則口碑載道謳思起矣孰謂蚩蚩者無視聽哉

鄉賢

至德要道爲事君事親立身之本處家則上下和睦居鄉則士民敬仰教化之所由生也見愛於當時揚名於後世一鄉有一善人而民服其德士習其化是以天下和平災害不生禍亂不作所關豈淺鮮哉詩不云乎有覺德行四國順之

儒學

周禮在魯儒術爲盛學者以德行爲本儒術以六藝設教於是士民彬彬多文學矣士君子果能閉戶潛修以吾之精神才智默契古人故發爲詞章運思劖刻風骨迥峻祖述經義辭旨辨博意蘊精深好古敏求各造其域束身踐行其教不肅而成不嚴而治其化民也豈不深且遠哉

友弟

秉性循良恭行友弟結嬉戲於丁年聯親情於皓首連枝共命同氣相依旣切慕夫推梨更愛深於讓棗或慕同居於張陳或慎護持於手足感友于之雅化惟慈敬以長存備書盛績以志規模

義行

博施濟衆固爲堯舜所病汎愛親仁亦屬聖人所許士君子苟能立行其德爲鄉里所服膺雖處危難身名俱泰顧視守財虜爲何如哉孝經有云德義可尊作事可法容止可觀進退可度德教可成而民愛詩云淑人君子其儀不忒

耆德

詩人頌君子之德曰俾爾耆而艾萬有千歲眉壽無有害斯不過讚禱之辭耳然歷觀古今享期頤臻大耋率多篤實純謹之人恆出於鄉閭韋布之士人溺若己溺人飢若

己飢其宅心深厚爲何如哉至若賦性剗刻機智峻峭逞
便給於一時夸雋巧於百衆席豐履厚之徒膏梁紈綺之
子儂哲有餘貪慕不足果能久視永年吾不信也

方技

初平牧羊左慈遊戲化鳥飛鳧喫酒反火世固不乏異人
民間自有奇士長房縮地開世界於壺中程濟宦蜀日宿
食朝邑凡諸技術列爲一篇

流寓

賢人君子人所敬仰每於旅居之所衆情忻洽雖非土著
卽其戀慕之忱或聊受一廛或就爲編戶以志永久不忘

之意斯流寓之必書焉

人物志

聖云十室必有忠信頻陽劇邑聿生傑俊志以節顯
績以宦成流譽千古士之所爭文武將相理學名臣
孝弟節義德行儒林亦有賢達甘心隱淪躬耕守道
不求聲聞絕無悔吝貞吉幽人作人物志載籍留馨

名臣

秦

王剪頻陽人少好兵事始皇帝拔趙定燕薊始皇謀取荆問
剪剪以六十萬對以爲怯用李信比信敗馳入頻陽謝強起
之卒以六十萬破荆擄王負芻平其地爲郡縣初剪將行廣

請田園以自堅卽今美原地子賁亦秦將伐魏引渠河灌城
王假降賁殺之遂滅魏又滅燕擄王喜還滅代擄王嘉乘勝
攻齊入臨淄人莫能禦王建以降詳史記列傳

漢

耿定頻陽人成帝時王商專權中外側目定抗疏論商陰事
下有司按不法狀後蜀人張匡指定疏論商竟坐免相

明

張統字昭季號鷓菴少穎悟日誦數千言洪武初舉經明行
修科由京兆教授遷東宮侍正歷通政司左參議十四年十
月改雲南布政司右參政尋陞右布政使又陞左布政使莅

滇最久草創鄉甲貢賦城郭公署壇壝祠廟法令條格公用
程則悉爲裁定民大悅服初統至滇卽疏請得以海貝布漆
硃砂水銀諸土物充秋稅又奏商人納粟金齒者如舊制聽
入穀皆報可二十一年入覲課最天下第一超擢吏部尙書
三十五年永樂靖難師入甫卽位名統暨戶部尙書某遂自
經統居官三十載功業節義巍然山斗兼勵清操至手耘園
蔬夫人績紡雲南富平皆有祠著作甚富多散佚其存皆見
頻陽四先生集

梁甫洪武間以孝廉舉授應天府尹在官八年清約不異寒
士初攜妻乘二驢往北歸仍乘之祿入多所存濟人亟稱焉

李恕字道夫號松軒貌魁梧美鬚髯有雄略而內忠篤由成
化丙辰進士授德平令數有措注歸藩王田裁閻氏惡積粟
萬石邑民樹碑頌其德己陞同知歷僉事會松州石鼓寨番
叛提兵破之無何大盜藍四起川東震動恕親身逐北前後
四十二戰俘獲七千餘衆遷貴州左參議長子宗橋以膂力
聞破川寇有功

李宗樞字子西號石疊恕第三子正德癸未進士授諸城令
政尙嚴飭境內肅然旋以治績拜御史劾都御史汪鉉不法
狀旣而攬轡上谷言邊機十事又陳安攘大計風裁凜然歷
官河南臬藩皆有聲會河分寇警冢宰科道交章薦其才可

大任晉巡撫扼要害禁奢侈畫便宜中州安堵會病卒不竟其施宗樞性慧才敏有幹濟略又工詩善章草所著有石疊集

楊爵字伯修號斛山生時室有火光長美姿儀身長七尺家故貧日挾書隴上耕且讀夜輒然薪雜誦以白兄寃繫獄邑令楊滋覽所上書奇而出之既從朝邑韓恭簡公學躬行實踐以聖賢自期許與椒山公稱韓門三楊嘉靖戊子舉鄉試第三人未試時於食館拾遺金俟原主還之明年成進士授行人三使藩國卻餽不受轉山東道御史將草疏劾大臣專權狀會以母老移病歸未幾母歿哀毀廬墓終三年有冬筭

馴兔之異服闋授徒講學越五年以薦起河南道御史巡中
城權貴斂避旋上封事數千言指陳五弊皆切中時事世廟
震怒逮治拷掠幾死是日都城風霾晝晦人呼楊御史風比
入獄吏受指加匣鎖沉獄五年日與周刑曹怡劉工曹魁相
切劘著述不輟既上以受釐赦出甫抵家復逮入獄三年高
元殿災上於火中聞呼公及周劉名因釋歸爲民二年有大
鳥集舍公曰兆在我矣遂卒病革時惓惓以作第一等人做
第一等事飭子孫隆慶元年贈光祿少卿萬厯初諡忠介所
著有周易辨解中庸解斛山集易庸二解在獄時著明史有

傳

孫丕揚字叔孝號立山嘉靖丙辰進士初授行人時嚴嵩焰方熾獨謝不往壬戌陞授浙江道御史巡視居庸順天等處偕同官鄒應龍力糾嵩子不法事士論稱快旋按江北發奸如神再按順天丰采彌峻轉大理寺右丞值新鄭用事不能所親程文詆丕揚坐落職未幾新鄭與文皆罷去起補原官嗣擢都察院右僉都御史巡撫保定深爲桑土計紫荆一帶增磚樓三百六座石垣一千九百餘里會張居正謀逐新鄭倚丕揚爲重權璫馮保居正私人也托爲建坊力拒之由是忤居正乃引疾去後以修邊功陞副都御史而居正終卿之調南京別用後起應天府尹歷陞大理寺卿戶部右侍郎

轉左侍郎風節益厲以忤時轉南京都察院右副都御史抵里辭疾不赴已又起爲刑部尙書改都察院左都御史定有巡方總約著爲令陞吏部尙書慮銓政流弊創立簽法復分南北中簽調劑之部選掣簽自丕揚始尋加太子少保嗣以御史趙文炳受用事大臣指劾文選郎某覲撼丕揚屹不爲動事白丕揚自念三朝老臣爲少年播弄因抗疏歸居久之復起爲吏部尙書加太子太保因時事齟齬歸不復起朝廷數遣官存問先是富邑屬耀州供役勞費公白撫臣奏隸西安至今頌德後以病卒於家事聞神廟震悼輟朝一日從優諭祭廕其子諡恭介著有應世草立山詩都院奏議巡撫約

束吏刑二部奏議格物圖論學篇富平志等書孫尤傑以授
中書僉事累官廣西平樂知府持名節多惠政在戶曹時以
不附魏璫矯旨追奪丕揚詰封冒死陳言事得寢時議多之
明史有傳

朱國棟字元培號西崑崇德子母夢神授古鏡光照滿室而
生中天啟壬戌進士初任蕪湖知縣調休甯補山陽三任江
南除奸正田戢叛兵惠政頗著入覲授戶科給事中兩劾部
臣五劾督撫丰采凜然其請更時政奏議激切中理人尤稱
之轉刑科都給事中數召對侃侃不阿陞太常寺少卿以修
典禮膺眷晉山永僉都御史復晉右副都御史擇將簡士建

豎尤夥軍民戴若神明尋晉兵部右侍郎鎮昌平以疾告歸
甫出都卒北極寺上憐之給葬廕子著有諫垣存稿撫關奏
議若干卷

田時震字出孟號御宿父見龍汝州學正歿祀鄉賢時震中
天啟壬戌進士自縣令官至侍御轉叅政直言敢諫觸權貴
數黜數起崇禎末以言時弊忤當事廢棄歸里所著詩文遭
兵燹燬於火餘奏疏一冊履難記一冊李太史子德序之弟
兄多顯貴而弟時需性坦直內明外剛臨難不奪遭逆闖寇
亂力拒僞命棄諸生尤有兄風

朱廷璟字山輝國棟子幼聰穎旣長性嚴毅言不妄發臨大

事從容有斷制順治庚寅進士授檢討調工部主事累遷吏部文選司出爲晉省口北道累補山東登萊豫省河北粵西左江分守道清慎自矢剔弊興利所至政績懋著自粵還過洞庭值風浪苦舟輕借隣船鐵二千筋壓之乃濟解綬十年鄉評尤美著有循寄堂集古文函始古文函餘仕學箴語間默堂文約鏡波園花木譜共七十餘卷

孝行

唐

梁悅富平人元和六年秦杲殺其父悅卽殺杲復父讐詣吏請罪詔下尙書省議卒用職方員外郎韓愈議杖悅一百流

循州愈復讐狀文載古蹟

元

王賈僧居喪廬墓一本至誠時人稱之

明

党榮庠生父冕以刑部主事得罪將遣戍榮上疏乞代高帝喜曰君親人道大倫忠孝臣子大節党榮能篤大倫全大節其令應天府給引還鄉并除父戍

李忍性至孝偶以獄訟當對縣捕之差役羅武朱素豪橫求忍不卽得繫其母同行且以繩穿裳辱之忍憤然曰安有辱母如此尙可共戴天者捶朱立斃自詣縣請罪縣官置以法

直指某公重而戍之

田而腴字沃千時震子崇禎癸未逆闖僭號脅諸紳強授以官稍抗卽械繫以輸餉爲名檄下僞令而腴父時震不爲屈賊將逮治而腴請代其父預決不免數諭意而腴曰父不逃陷父父子並逃陷宗族父子俱往俱死無益也卒自行陷長安獄拷掠備至賊東行挾至平陽殺之僕瑞麟以罵賊並遇害時而腴季父時茂亦緣拒寇被逮子而大協而腴同代父往以計得脫雖生死異轍均以孝行見稱於世

孫忽邈字舜寶父世吾被賊追逼忽邈請代其弟忽邁不忍隨兄往同時遇害

富平縣志卷五
三
仇養蒙家貧性孝親偶不愉輒長跪謝俟解始安親未食不
敢食負粟耀州竭力承歡母病躬湯藥夜不解帶父足生癰
以口吮其膿血立愈親歿哀毀踰節廬墓六年年八十每詣
墓作孺子泣直指上其事蒙旌子桂芳以舉人仕涪川中牟
二縣令有德政事母亦以孝稱

本朝

田文耀字君白庠生天性孝友文學優長爲馮恭定公高弟
子明秦藩招試雪竹牡丹諸詩賞其工麗永壽王延爲上賓
旣請業焉明亡棄舉子業絕意仕進呂學使雲藻曰吾閱士
多如田子眞學者也長子德溥性行和平事親尤謹嘗通宵

侍側父命之退已復潛入屏氣立夜半父下牀溺急前扶持
父驚問知爲溲笑曰良苦汝又以禮自束檢雖酷暑衣帶必
整里有羣聚嬉譁者見其過掩戶匿聲曰此可令西院大秀
才見耶

党國虎六歲母亡寄養舅氏父普寬兄廉生爲族子國孝毆
死以事未露國孝幸免國虎悲甚揣力弱未能報年十九歲
乃誘國孝於野並其子尋兒搗殺之詣縣自首赴獄令欲加
卹國虎念父仇已雪自經死前令郭公傳芳創忠孝祠首肖
唐復仇孝子梁悅像以國虎配

唐文昭字含章庠生父歿齋居三年繼母偏愛己子因逐昭

別居益肆力稽古精理數學御史何丞都造訪其廬贈以金
卻之固贈以布獻諸母母卒悔悟呼歸家故貧每值大禮邑
人重其學行斂粟贍之前令郭公傳芳創祠祀孝義三人文
昭與焉

竇琳昌父鳴鳳以三戰斬獲功授世襲指揮早亡琳昌事母
孟氏曲盡子道母病嘗便以孝行舉蒙

旌月給米布歿入忠孝祠

郝振綱監生性惇實事寡母以孝聞事無大小皆恪遵母命
年十五入市鬻線拾銀八兩坐待失者至暮母遣人喚歸詰
其故喜曰待之良是詰朝失者至母輒令還之旣長習幕學

爲養母計應聘入晉不忍離母將以行久之歸母聞堂姪婦
貧寡鬻子憐其孤苦綱卽贖撫之又教綱養同族孀婦子郝
仕得成立葬族人某某夫婦撫其子皆虔奉無少違洎母病
歿哀毀踰節廬墓三年雍正六年蒙

旌祀忠孝祠

常崇仁弱齡喪父孝道克全事節母王氏尤極篤摯生養葬
祭情文交至前學憲逢公泰准給衣頂寵附宮牆歿祀忠孝
祠

姚冲瀛字伯海性馴謹稍長知孝家世寒微生未授書然問
視諸子職率意爲之輒暗合康熙戊子父播歿致毀以貧故

不克葬苦塊柩側自炊以食妻子饋食斥弗御二年母歿亦
如之更二年始克葬既葬廬墓傍日於百步外膝行戴囊土
築墳歷數年以戚友力勸始歸每當祭或外出必前期返哀
慕誠至迄終身如一日又善教子卒日里諡孝慈乾隆元年
旌表祀忠孝祠

唐鼎鼐隨父四維客興安父死鼎鼐年甫十三負父尸歸道
遇伏虎顧年幼不知爲虎迫視之虎終不動同行柳姓者逃
伏山頂下視見其狀歎爲至孝所感泊事節母竇氏曲盡孝
道友愛幼弟鼎元訓其力學得人庠

溫多藝康熙乙卯寇掠頻山負母逃難母恐累及藝給云少

息藝方蹲踞母遽投入水窟卽擲身隨下時值中夏窟深奇寒藝戴母立水中翼日衆共救出母子無恙

陳覺字企卓號退菴庠生德行優卓言行可法事母李氏生養死葬毫無遺憾事叔父如所生事長克恭事師盡禮信友卹隣讓產焚券美不勝紀博學能文尤邃於詩

師其禮年少喪母於幃中設榻夜展衾晨起灑掃上食如母在晝夜號泣三年餘未及舉葬而死乾隆四十二年蒙

旌

王汝翼懸幕甘省事繼母孝本堡有老而無子及老而子幼者並藉翼糊口閭里推焉

李嘉才事父母孝母欲進香太白山艱步履才背負而前往反二十餘日血汗透衣外母病便血禱神祈代母尋愈而才病如母者數日人咸異之父母相繼歿廬墓三年已仍頻頻赴墓所起居如生存前令如皋陳公表其門邑人士贈以詩文復碑其地曰李孝子廬墓處

李銓吉庠生力學敦行事孀母孝事孀孀如母前令王公以優舉撫軍嘉獎府憲表其門曰孝義可風

魏基長庠生事繼母孝教異母弟成立學校重之以優舉

曹楷字端林有孝行父病痢年餘躬親浣濯不假兒孫手比歿食朝夕必薦出入告白柩前如生存時教子身爲義方居

恆好施予姻黨中婚喪未舉者多周恤之歲饑又出粟賑濟有以匾聯稱謝者固辭不受人推盛德

忠節

明

張建貢士山東按察司僉事因妖女作亂城陷死

路俊字文英宣德間以強力直文華殿尋官錦衣衛百戶從英廟北征土木敗績俊持金瓜奮擊潰圍出號諸軍無應者復衝敵營入未達行在力竭遇害天順間錫詔褒之謚昭信以子誠世襲錦衣衛百戶

李時祥父宣任成都衛百戶有智略成化中以討六川高梁

寇死事官時祥正千戶貴州土夷叛祥隨征所部斬獲獨多
陞指揮同知

魏汝孝萬曆乙未武進士清水營遊擊征寇陣亡廕其子

朱崇德號涇菴方巖謙恭以子國棟貴封中憲大夫凡公私
利弊無不直言關白當路辛巳奇荒捐濟二百餘金本族百
餘家賴以舉火遠來者計口給糧全活甚眾洎闖逆據關追
餉乃自縊卹贈副都御史

杜邦舉任鄆陵典史崇禎十四年城破被執闖賊知其得民
欲降之罵曰朝廷臣子豈爲賊用賊怒截其舌邦舉含血噴
之遂遇害

魏光遠光山典史崇禎十三年賊陷城死節

魏鎮虎平陽營參將崇禎十五年征寇死豹子山賜葬祭

程雲達字天衢庠生明末逆闖據關中使賊眾要之不屈露刃強逼拒益力賊以刃割面入骨仆於地乃去

趙希壯文水縣典史崇禎十六年流寇圍攻希壯率鄉兵出戰死之

陳忠心庠生才品氣概重一時闖寇入關聞其名招之不從強逼之更以官餌拒益堅繼以拘繫迄不少挫遂見殺弟正心力兼數人精武藝任河南營守備嘗以數騎偵賊遇大隊圍之鼓勇奮擊拔眾歸署城守都司崇禎十四年賊至河南

請率眾出賞賊賊佯敗誘陷峪中使人招降正心戮其使聞
城破自殺

竇汝器幼穎旣長尙節義以歲薦授城固司訓崇禎癸未闖
寇入關諸郡風靡汝器勸邑令繕陴練卒戮力拒守旣賊至
眾潰度勢危歸整冠帶望闕拜畢坐明倫堂待之賊入殺縣
令執汝器抽刀脅降大罵不屈死泮池側血漬入石歷久如
新

馮霽字腴田博學精易數明末鄭軍門延諸幕籌無遺策後
從孫軍門戰死河南子往求尸不得哭死

劉大才明季任甯陵典史署知縣值闖寇猖獗城毀幸士民

重修後被賊誘掠迫脅不屈遂遇害甯人築墳安葬仍立祠祀之詳甯陵志

路由中字達寰明季山西臨縣尉遭逆闖之變迫脅不屈繼以痛罵遂遇害

本朝

李鷗鳴任湘潭丞遭吳逆變亂迫授長沙知府堅拒不從王義民嘉善縣防守遊擊順治三年流賊餘黨竊發民挺身出戰所向披靡旣賊設伏峪中誘之復單騎深入遂遇害同官劉肅之率敢死軍數百人奪其尸以歸

孫一鷗順治時任廣東水師總兵征海寇戰死事聞賜葬祭

贈光祿大夫世襲哈番

陳有虞字大陸順治壬辰進士任仙遊令勞心撫字在事二年順治十一年十二月間值海寇攻泉漳郡縣吏望風奔潰移兵攻福州以仙遊爲福南藩地是月十九亟攻之有虞守禦有方不能克旣遣賊十餘人薄城說降有虞射之斃其一乃退有虞故善騎射莅任初卽慮賊猖獗募鄉勇二百人自將健丁十六人董率編成隊伍復繕樓櫓修守具設賞格爲桑土計賊入境輒自率擒俘稱勅卒時撫軍佟公亦以仙遊地衝調興化遊擊王嘉貞率兵三百協守賊樹柵環攻不遠克久之復射書城內說降設格募致縣官有虞得書集士民

示之曰殺吾以降眾可活咸泣下請死守數日復說降不答
守備愈嚴又數引兵出城擒殺賊怒益兵力攻火炮衝梯一
時並舉有虞隨宜捍禦攻七日迄不能克賊計窮更於城下
說降有虞抽矢射殺之撫軍佟公聞賊攻仙遊勢危急檄興
化副將楊進忠赴援進忠逗遛不進賊偵知圍攻益力有虞
嘉貞立箭炮中指揮截堵賊稍卻乃暗穿地道使細作夜入
城約奸民舉火爲內應擒之斬首示賊賊相顧失色有虞慮
民變集紳士申前議皆感泣誓如初賊數失利轉怒因大益
兵合二十餘萬集城下鑿地道納火炮名地雷繞城俱發聲
勢撼天城崩二丈餘賊蜂擁入有虞知事潰約嘉貞分卒巷

戰自率健丁轉鬪而西身被重創忽馬蹶仆橋側中鎗死嘉
貞亦戰死東城魏公祠前健丁趙啟遜朱世傑耿三啟馬汝
騏柳光擢高昆陳龍竇興來虎竇正寶陳福王成德李彪黃
元芳韓昶張奇等十六人惟柳光擢幸免餘十五人並從戰
死時十二年正月初五日也城破五日三官堂僧海珏入城
於積尸中檢其尸面如生長子常夏冒死入閩訪得載歸事
聞

贈福建按察司僉事廕一子入監

賜祭葬子常夏蘇州知府時夏平湖知縣肆夏寧化縣丞均有
善政常夏子協濟句容知縣勵清操禱神驅虎民尸祝之協

哲江陰知縣協文有文名以進士任寧德知縣協哲子崇禮富陽縣丞五署縣篆並勵清操循聲大著著有隄鹽紀略

魏朝璉字華然性孝友明末父官懷慶府倉庫局大使旋卒於官璉年十六獨扶櫬歸值闖寇擾河南道路梗塞晝伏夜行渡黃河舟子詐財詰以藏兵欲開櫬檢視厚賂始免愛胞弟文籍如手足康熙二年任廣信府興安尉不用行戶壬子吳逆變攝邑事甲寅實授會耿逆復作郡邑淪陷守令盡逃避入南昌知府高語弋陽巡司以書招璉不應益奮勵率城中男女殊死守半月城陷賊授以冠帶擲地大罵遂遇害巴廷傑樂安典史三藩作逆城陷不屈死

富平縣志卷三
三
名宦

後漢

李彥溫富平人今尚書村其宅址也乾佑間朗州馬希萼遣
兵次長沙楚王馬希廣命彥溫將兵拒之官指揮第二都頭
兼都虞候銀青光祿大夫檢校刑部尚書兼御史大夫上柱
國墓碑在村之南

明

爾朱欽字敬伯夙有文望洪武壬子鄉試第一明年會試高
帝親製敬天勤民策問欽對稱旨賜進士補蒲圻縣丞廖道
南辛亥錄贊云敬伯登庸納言效忠乃贊邑政明試以功

劉春景泰庚午舉人天順間知冠縣公廉明斷邑民畏而愛之刁猾屏跡威信大行

王來鳳以監生令西平先是歲饑道殣相望鳳側然念之因謀實廩庾爲閭閻備出藏金易粟益以贖緩得穀六萬餘斛擴倉楹五十四所在任數年毀淫祠表忠義平徵斂覈會計政績不一兼長聽斷案無留牘尤守清介陞安樂知州念親老請歸西平有祠提學葛守禮記之

王良弼嘉靖間由廩監授蕭山簿旋陞蕭山尹有才能善折獄先是海水崩堤屢築弗成經弼區畫不踰月而固邑南螺峰寺山水爲一邑形勝隣境勢强者欲奪之弼斷還人稱果

決

周文煥字堯章號闇然萬曆庚戌進士初授諸城知縣捐俸賑饑活數萬人癸丑奇荒募淮南轉粟以中幣衡收準市價不昂其值設粥廠七十所境內大濟惠及隣邑就耆如市以卓異歷陞吏部文選司郎中時魏璫欲相逆黨崔呈秀堅持不應呈秀數名之謝弗往璫婿閻青雷覬超遷終不可得璫怒矯旨戒冢宰自爲政勿聽選郎文煥乃引疾罷去以憂時嫉奸嘔血卒子有憑三中副榜性豪邁有膽識崇禎間孫總帥白谷兵肆掠府邑有憑隻身詣軍門力請調兵歸營辭色嚴正孫不能屈卒調兵歸又慮流寇焚擄規創寶村堡城以

備守禦至今賴之

唐光耀字玄白萬曆癸卯舉人任宣府推官時爲魏璫建祠
耀不列名又任臨江推官陞南京刑部郎中持法平允請釋
失入罪犯陳光衛人尤美之後爲閹黨陷害下獄死莊烈時
贈奉政大夫

張橘天啟辛酉舉人初任東阿知縣時南石頭民多爲盜撫
兵議盡勦橘單騎往諭黨遂散取渠魁寘之法餘罔治民大
感服繼陞昌平州守給牛墾荒三百餘頃捐修學宮毫不累
民遷本州兵憲庚辰奇荒賑米二千餘石人賴以生兵民敬
畏若神尋轉冀南少參甫莅任以病卒不竟所施士論惜之

本朝

田本沛字漢元號華石父宏道明時以世勛襲授莊浪左所奉職惟謹當事器重之旋念親老拂衣歸以本沛貴累贈奉政大夫本沛少敏慧嗜學目一過輒成誦以名諸生登崇禎丙子鄉榜癸未成進士值闖寇據關中欲授以官曲避不應

本朝定鼎授長洲令招集流移殫心安輯時大兵頻過隴畝騷擾設法築垣通騎不損禾稼大兵後商賈裹足乃給帖通貿遷聞風皆至兼以催科廉恕折獄敬慎清漕弊豁懸租革行戶吏不下鄉民極德之會以餉芻舟夫供給禁旅計夫數十萬公慮貧富役弗均按里分派公幫公僱公私兼濟再任蒙

城招流勸墾清催科刁訟諸積弊節革幫漕幫驛諸浮費葺
學築障賑民教士善政累累視在吳不啻考滿遷工部主事
再補屯田主事奉使衛河治漕監築皆有法毫不累民遷刑
部外郎陞正郎已而督學閩省矢公慎嚴條教慎簡拔所取
皆名下士蓋公素精人倫先是鄉試同考俱號得人至其雪
誣燭奸人尤稱之考績晉參議以候補歸里屏居不預外事
孝事繼母敬兄友弟併崇任卹歿祀鄉賢著有家譜及蒙城
志漆園草栩栩居存詩行世

趙兆麟字玉書號聖居父一韓事繼母以孝聞兆麟有奇才
以舉人丁明季亂闖寇逼授神木道

富平縣志卷五
本朝兵至謁 親王委署延綏都御史不數月邊鎮清寧奉

命入覲授鄖陽巡撫禦寇濟饑民漸安堵會主兵欲於鄖屬搜西山賊黨兆麟懼株連無辜力請得寢供兵養馬調濟有方招集脅盜悉歸命出俸造江南湖廣撥漕運船二百餘號時運夫勞頓苦乏資糧餘米未交三百餘石疏請巡理江路抵漢中見當事者言民困苦狀且曰若得依漢中米價折輸良便當事首肯歸卽具疏陳前事蒙

允折解餘漕留襄准作楚軍口糧已復興文教輯襄志建城樓禁苞苴革火耗墾荒恤驛簡訟懲蠹歷六年以疾告歸卒於家著有春秋點註祀鄉賢又祀湖廣名宦

袁廓字字子遠號綏南少習兵略抱經濟才

國初受知內相洪承疇爲參政監軍運籌指示無遺策亂定敘
功授池太兵備道旋擢七省漕儲道值洪公經略南省改陞
巡撫偏沅共理軍務楚滇悉平在沅八年尤多政績後以兵
部侍郎右副都御史

予告歸居鄉敦崇孝義多所建營卒祀鄉賢子建業以敵愾捕討
功累官山東協鎮總兵莅官居里咸有懿蹟事母溫氏尤以
孝聞又楊味道王惜民皆以謀略參洪公承疇軍幕平五省
李鵬鳴字圖南號約菴順治乙酉舉人授中部教諭以優薦
遷密縣令甫下車訪民間疾苦歎曰防決無術供師靡費清

占多徇有一於此惡用令爲因悉力興革紀績諸曹者凡十有四被

詔入諫垣爲禮科給事中累歷兵吏兩科遇事侃侃直陳多所建
白癸卯校士兩浙矢公慎得人爲盛著有諫垣奏議

王繼祐字植三號痴菴幼穎稍長知向學入庠後試輒冠軍
順治乙酉舉於鄉久之選授鎮平知縣縣故巖邑而土瘠民
貧稱難治祐下車卽革供帳諸物除弊懲蠹勸耕撫逃尤崇
學校兼長聽斷其他清鹽課釐屯田舉常平興養濟葺縣治
修邑乘善政累累不勝紀豫撫張公方力薦銓擬內擢遽請
老歸以子象天貴封奉政大夫著有信心草四書直解俟刊

行

王象天字文石號穎山繼祐子順治丁亥進士初授臨漳令自奉菲薄教民各勤職業游惰有罰任六載迭擢災祲三請蠲額計萬餘兩又久雨河溢壞城八百餘丈率屬捐俸重修開渠洩水後水復發發凡四次城餘三板迄無恙行取授太僕寺丞遵

諭陳言奏漳民三苦乞恤協濟明經界均優免奉

旨允行陞戶部主事轉貴州司督儲臨清酌量緩急河無需艘出監新西關清浮額銀萬餘兩歷江西山東二司除舊例幫船銀數萬兩甲辰典試山西取衛旣濟邵嗣堯等四十八人丁

艱終喪補湖廣學道矢公慎勤搜羅詳除官童票發頂冒改撥四弊選拔得熊賜瓚江蘩諸名公未竣事以病卒於官象天性仁孝善體親心事繼母無異所出愛諸弟如手足族戚待而舉火者數十家皆恪奉父命無少違著有望雲軒集王氏家譜刑戒註釋學政條約若干卷

石在閬字雲門由選貢授中書舍人既參親王幕從征雲中以功陞授福建督糧道望悞落職久之事白授昌平兵備道時以圈地後民殊困窘閬捐牛種督墾荒地一萬餘頃旋以久雨米商罕至舉城磬罄閬區處借糶兵民俱甦後值水旱設粥廠施布疋存活甚衆又建議區兵民居築城垣修倉儲

葺學舍弭盜抑強以治行最

賜璽書章服褒美踰年陞授蘇松糧道力陳漕務利弊裁陋規擄
供應清欠革耗省費三十餘萬丁艱服闋補湖廣糧道值寇
據茅麓山

王師南下閩轉餉不竭士皆宿飽以積勞卒

陳開虞字嗣徽有虞弟有虞任仙遊時開虞方遊吳越聞兄
殉城死哭奔閩海迎其柩值定遠大將軍求文武才招試數
百人開虞與焉居第一承制授漳州同知繕雉堞嚴斥埃募
勇敢寇不敢窺民賴以安連署龍溪等四邑皆有政績陞江
寧知府在任六年大兵大役支應有方毫不累民又清案牘

辨冤獄釋株連活凡數十人力請除浮賦數千金子芳夏以太學生任武康丞援陞例補義寧知縣調荔波縣在武康察革積弊佐以安靜在義寧除陋規清滯獄葺學築城在荔波化蠻俗禁仇殺闕惡習一變

石天樞字右函在閩子性仁孝以康熙己酉舉人授內閣中書舍人遷戶工二部郎中擢天津道莅任後冰蘖自誓正身倡屬禮士恤民實政可紀因呈誤革職津民數萬叩

闔保留奉

旨免議再任江南督糧道江南財賦甲天下務繁弊滋樞守潔才敏事無巨細不假胥吏手制府甚重之後緣入都候補值西

逆作難奉新例自備勞費身任轉輸軍功議敘加二級紀錄
三次補職在卽自念精力漸憊旋里不起至

聖祖西巡迎

駕潼關承

溫旨獎其精健

諭令補官以老病確辭蒙

御書臨明臣董其昌書法一幅賜之天津政績詳德政錄

田若琬字未若號少華本生父本建以孝友重閭黨兼擅文
名甫生若琬兄督學公本沛妻劉恭人抱歸養爲己子旣長
好學多識內行尤醕備隨任京兆以諸生入太學中順天己

酉舉人授樂昌令初下車念邑界楚疆滇變蹂躪因務撫字不急催科減額耗十分之四某撫憲行均差法雜派浮正賦他令皆謹奉行民甚苦之公獨以貧瘠告得免派乙亥值荒捐米千餘石煮粥活民又念昌邑久無登甲乙科者修文廟立義學課士惟勤文風一變科名不絕在官十餘載服用如寒素家不增尺畝獨以向諾李子德先生代刊詩集之囑出俸百餘金鑄以行世公留心經濟自性理外兵農諸學射御技勇無不嫻習顧小試一邑爲當事所格不克大展子六人皆名士

李思沆字聖知號澹菴父愨樂善好施沆性孝友有父風由

選貢授東莞令懲頑緝盜尤善摘發兼勵清操行取刑部主事數訊大獄多所平反卒於官

張愷字子丹號月厓康熙壬戌進士任崇仁令請發倉賑貸禁溺女有虎患爲文祝城隍虎遂屏跡厯官戶刑部郎清慎自矢督學廣西革場弊正文體絕夤緣所拔皆單寒名士

王雍字默公號華麓康熙壬戌進士授魯山令政尙嚴明豪滑屏跡久之治化大行報最

名拜兵科給事慷慨任職以先時發帑賑秦當事者怙勢恃援訛法乾沒特疏攻之聞者咋舌或諗雍雍曰天下事予所欲言有大此者姑以爲兆耳章未下舊疾發告歸未幾卒囊無餘

財子二長作霖己卯舉人次作楫庠生

竇祖禹字大緒少不羈康熙壬辰進士授婺源令興利剔弊政聲頗著某科入簾卒闈中婺民感德共請迎柩歸婺築墳建祠春秋祀之著作散逸存有待刪草詩集一冊

師士式字完貞性耿介持己端方知藍山縣值蝗祝天蝗卽死引舜水灌田百餘頃勸墾荒地二萬餘頃招流安集五千餘家禮賢士課農桑弭盜鋤奸寬徭革弊尤善聽決以卓異擢吏部員外祀藍邑名宦又攝寧武臨武皆有政績

陳範忠字子康熙丁未武進士授守備擢廣東碣石鎮遊擊十九年海寇犯甲子所擊敗之三月進征磊門五月征鷗汀

背海口俱有功二十一年從兵平臺灣沿海悉定除甘州城
守參將三十八年陞汀州副將巨寇朱紹嘯聚龍門山永定
歸化諸縣大擾範率兵搗巢一鼓平之民賴以安邑人竇鳳
輝有傳

楊貽清字白公號介菴諸生事繼母以孝聞與李子德李二
曲諸公遊晚年授黃陂丞康熙三十年關中饑民流移入楚
者塞道路奉委安撫調度有方全活招歸以數萬計在黃請
除漕費至今尸祝

王維威康熙三十三年任石城典史視事甫三日閩逆來攻
與照磨李道明協力守禦晝夜登陴二旬乃解十五年劉應

麟兵至城下維威與戰破之嘗巡城流矢中臂不爲動三載寇平卒保危城維威實有力焉載通志

魏萬捷字延之汶上主簿河工舊例工食多侵欺捷一切清算卽以羨數倍給工人併捐己囊若干夫役踴躍趨事每一堤成歷久不壞

來珽字叔和號定齋辛卯舉人授樂亭令孝事孀母暫離輒不安母歿執禮尤至在官時拳拳以愛民爲心不畏豪貴不迎合上司值水漂民舍捐助修復令築隄防護民德之著有正學書警覺錄探源編藏於家

李樟字章木生而穎異稍長就學以大成自期待爲詩文皆

自成一家以名諸生聯捷乙酉丙戌甲乙榜謁銓得東粵平
遠地險風陋稱難治樟至釐積牘除宿蠹苞苴請托皆嚴絕
不少假力表孝子捐設義塾甫數月治化大行會邑紳某某
以某鄉五莊田腴賦輕擬律侵凌控惠潮道下府按之樟念
五莊民命繫片壤且巖壑回互林樾叢錯勢難均理密遣人
授意而別差縣胥隨道吏往視至則百姓皆攜眷冒雨立山
上呼曰累年力墾得尺寸地必見奪卽吾輩駢死矣無寧棄
之去歸報府君因據狀詳請事乃寢又某某以觸禁出二百
金托某紳求爲地其人來謁語移晷憚樟嚴毅終不敢發邑
舊規具公辦銀三千兩前令循例咨用樟盡詳革督撫方合

章薦樟遽以病乞休去閣邑遮留依戀立祠祀之樟亦洒泣
相慰其留別詩有猶竊循聲煩父老遂叨尸祝溷明神欲把
臨岐雙眼淚遍隨秋雨洒良苗之句歸里十七年家政鄉行
膾炙人口病革索箋自書曰譽咎叢生未免鄉人誰定論質
文頓盡且乘大化自全歸擲筆而逝著有常華園詩集已刊
行餘藏於家

王者公字亮臣宜陽典史邑北道通數省居民稀少爲羣盜
出沒地者公捐俸造屋數十間給牛種招人墾田立莊兩處
一名安遠一名王建嗣是居人漸密行旅無虞事詳宜陽縣
志後值民變公挺身出諭事乃平活數萬人又山路衝決往

來不便捐建石橋眾感之樹碑其側名王公橋以病歸民立生祠祀之

何世寵字九錫由例監保舉知縣歷署永昌武威平番寧夏度支軍務籌辦災賑以才能著補平羅值寧夏地震後人民凋殘城郭無存新羅二縣併歸平邑寵修築招集給牛種開廢渠得田萬頃仍捐田興學績最一時調張掖丁艱服闋除蜀渠縣疾作請休歷官多年囊無餘資鄉里稱之

孫聯捷字迅發雍正己酉舉人教習

內廷館課嚴切及門掇巍科者十餘人乾隆庚申授綏德學正砥礪文行造就多名士丁卯撫憲陳公以知縣保薦初署保

定尋補容城潔己愛民承辦

南巡差務能於職八閱月丁外艱客館蕭然邑民輸送薪米僱
驢車送歸而爲位書院以祀服闋署豐潤蝗爲災多方力捕
績最他郡邑補寧晉山澤有涸出田請得免陞科建奎閣創
書院課生童署中丁丑東明水方制臺摺奏調補抵任賑粟
瘞骸捐施綿衣隨築堤浚渠去積水民用奠安辛巳擢滄州
牧適大旱捕蝗設粥廠復疏通淤渠緝獲盜窩諸所措布皆
利民之大者乙酉

上南巡

行宮賜宴

皇太后賞端綺荷包僚佐以爲榮滄人繪賢勞圖頌之丙戌以年告歸卒於家捷好讀書歷宦數十年未嘗廢學著大學中庸心解在容日刻楊椒山忠愍公集又代友人刻讀孟各書景雲其三子也孝友力學早歿邑先達任鵬遠題其墓曰篤行士四子步雲任邳睢水利同知

趙廷健字若乾乙丑進士任崇明縣前知如皋丹陽并署江都剖疑獄築海堤愛民造士恤困扶危俱有循蹟捐修本縣宮裏橋人尤稱之邑人樊元助有記

封爾爵戊午舉人任華陰教諭勤於課士捷取授棗陽令有惠政歿於官兩地士民感念弗衰

馮淑眉字學海辛酉舉人以明通教諭朝邑協辦賑務撫憲
陳公大加優獎計典卓薦丁外艱服闋補鎮番諭倡捐置田
歲取租息爲士子科舉路費至今攸賴嘗奉委行縣事柳林
湖鼠食禾根殆盡力請賑恤民爲立生祠楊制臺保薦教授
洮州尋授新化令丁繼母憂未到任卒

党新綬戊辰進士父內修鄉飲大賓事親教子見推鄉里嘗
焚券數百金綬歷任大庾永豐長寧知縣嚴明平允所至著
冰蘖聲改授西寧教授旋補開州判課士牧民並有循蹟歿
於官囊篋蕭然綬童年受知前令喬公讀書內署服官後力
學論文無虛日厚本敦倫尤爲士林推許

鄉賢

元

王壇美原人官千戶好涉書史有膽略性不嗜殺而摧鋒陷陳戰功獨多征蜀時與士卒同甘苦故樂爲之用子孫並官千戶

劉允中號西澗大德間授順鹿路總管討叛酋有功調廣南
部尹治故事三五姓聯戶餉馬民苦甚酌令月出錢緡市馬
人安之遷長寧州同知地接蠻徼允中招徠有方又教種陸
田作水車引漑夷民感之後改涇州值歲饑多方賑濟全活
甚衆既請老制以耀州知州致任

張成之幼卽有志刻意讀書官朝請大夫河南督轉運使鹽課頓增子文賢四川道廉訪使彥成進士四川廉訪使彥文延安稅務提領友文四川嘉定州判官文冲奉元路治中允恭鞏昌府知府允濟同州府提領一門八士皆有才名

劉尙字伯升家貧嗜學官至京兆知府兼招武大將軍軍民總帥有破鄆都海白順紅巾功子安世耀州乾澗山塲提領安國宣命銀牌征行頭百戶安民藍田縣主簿安世子源安撫司知事瑛遂寧監司副使安國子斌宣命金牌八番蠻夷土木洞軍民長官安民子燧寶安庫支納三世縉紳爲邑望族

第五昌言字聖俞尙節概不妄交人閉戶讀書淡如也爲奉元路儒學學正有善教克稱厥職

張敏大定四年進士先世習醫術急人疾苦敏尤端樸以孝稱初授解州判官遷平陸令調聞喜有惠政歷官陝西省左司郎中所至稱廉謹子八人統吏部尙書爲名臣緹鈇天監丞餘子皆勵隱德所著有月山集人稱月山先生

第五勝愚字仲學昌言從子元末不仕鑿洞萬斛山中居之甘貧樂道家有始祖第五倫像至明孫公介公猶及見之補綴線跡不下萬餘歷千五百年子孫能守可敬也

明

第五全有抱負舉明經知山東莒州三年大治入覲以病辭
上敘褒之

党忠正統辛酉舉人初任磁州遷榆次教諭工文詞淹貫六
經旁及法律靡不究心遷伊府審理卒人咸惜之子俊以舉
人知故城有惠政陞知州父老扳卧不得行又相率請留得
以知州視縣事民生祠祀之次子偉仕司訓

劉順字孝天景泰乙卯舉人少苦貧灌園養母遇方士授以
易學殖日進每構文無筆札輒以木畫地成之歲不給負米
同官山中值邑宰索某士子文苦無以應因歛順請代順援
筆立成宰見大奇之旣以儒士舉於鄉就試時士爭求識順

其見重如此比宰夏縣猶衣不掩膝誠確樸直有古人風
梁瀾字天衢爲諸生時刻意尙行讓產還金人服其義以歲
薦任河南府訓導力卻餽遺俸入自具衣食外輒推以予人
學憲王鳳泉亟稱之致任歸焚香潔坐課子耕讀鄉里推爲
介士

王宗堯字汝敬號泉岡嘉靖戊子舉人官郟縣修河渠建社
學百姓德之陞綿州知州旣而棄官歸父子兄弟藹如也令
郟縣有去思碑

張儉以歲薦司訓獻縣爲諸生時學行足式文人碩士多出
其門比士教尤有法獻士宗之子懷遠博聞強識復以善教

著稱擁高座者垂二十年推世美

樊盛監生任汝陽丞勵清操勤職業九載如一日力救荒災
尤堪稱最以疾歸爲里望人當路七旌其門楊御史伯修紀
其事孫鈺登鄉榜咸稱德報

孫惟謙字幼搗號前川孫恭介公父事繼母以孝聞由選貢
受寶坻知縣節愛教民俾勤耕織構訟者至公所訓之不聽
始責之縣故有銀魚廠中貴緣以爲利惟謙懲其羽翼歲省
無算又命縣東南瀕海秋時大盜多匿其中申明保甲先事
爲備賴以無虞後忤當路罷歸囊橐蕭然民德之爲立祠郝
進士鳴陰紀之旣歸閉門養靜卽貴紳過訪罕得一見歿後

陝西布政使朱炳如題其墓曰七勿先生所著有家訓及去思集傳世

李隆清河典史署縣篆適有寇變練鄉兵捍備民賴以安子廷實字道充號和齋靈寶訓導孝親讓產曾尙書督陝學時嘗旌其門文章道誼雅重一時詳孫立山恭介公所爲墓表恭介其受業門弟子也

由天性字純夫號巖齋嘉靖癸卯亞魁有文名性和厚樂善取友一出至誠每檢陰隲諸事以自警惕初知郟城再判合州所至人感練鄉兵抗巨寇厥績尤著

樊尙禮汝陽丞盛長子讀書好禮父死不作佛事鄉人化之

嶧山令趙公表其墓弟尙文監生官唐縣丞攝邑篆尙武事
兄悌兄弟建議立祖祠歲時薦享楊忠介公嘗曰邑人知孝
敬自君家始鄒蘭谷應龍書其事武子鉞又更新祠制鄰邑
來觀人稱樊氏有三隱君子初尙武無子以禮次子釭爲子
及釭貴或以陰德推禮禮曰此吾弟善教使然也人多其友
愛焉

樊釭號對峯與孫立山恭介公爲莫逆友嘉靖乙卯舉人任
岳陽及安定教講學課文號斛山後一人後令猗氏著有循
聲孫恭介紀其績深爲推服焉

紀道嘉靖間以明經任阿迷州州同有惠政初道與楊忠介

公同爲朝邑韓恭簡公門下士博學能文章有冰雪操乃恭簡所深器者故爲其會大父清軒鶴公親撰墓表見苑洛集張志遠字通甫隆慶中捐資疏渠人感之名其渠曰懷德邑令劉公兌均田之役以達公正專意委任又建橋梁修八蜡祠歿時劉公助以槨孫恭介公表其墓

張執字叔允萬曆己卯舉人由教諭應遷徐州知州陞河間同知在徐以修河工竣蒙神宗降璽書賜帑金獎之旣復訪拿謀叛妖人趙古元脅從罔治活數萬人又識萬進士崇德於未遇前衆稱人鑑徐郡名宦富邑鄉賢兩祀之

田士亨以歲薦爲秦藩長史抗闈掛冠歸

富平縣志補卷五
三
喬惟忠天啟中任鄒縣典史時妖賊作亂當時事多議招撫
姑息養奸惟忠設法捕勦挺身捍禦不卹掣肘賊平兩臺交
獎鄒民感再造恩建祠祀之

李盡心庠生援例補鴻臚序班性孝友樂施濟婚喪弗舉者
必周之嘗捐千金建石橋人稱李公橋南遊出千餘金平商
於崎嶇人稱李公路入義倉粟滿千石復捐千金修文廟百
金修鼓樓關輔饑出二萬金賑之另以百金賑庠生中丞直
指入奏上異之特加榮表賜光祿少卿銜建天下義士坊在
南郭祀鄉賢

孫鍾皋字唐斌力學篤行事繼母以孝聞崇禎癸未進士授

寶應令再署興化所在惠政民立生祠祀之聞親病篤卽辭
官就道抵家猶及覩面明亡與門人張乃第同隱不仕所著
有天逸集

魏麟圖生員明末寇盜蜂起所過村落並遭屠陷流寇劉永
才誓拔莊裏鎮圖率衆死守約束嚴整賊再四攻卒不克去
闔鎮保全

本朝

張乃第字魁門一字愚齋明崇禎十年舉人少孤依祖母比
歿厝柩祠中朝夕泣拜偶他出數日歸而入哭幾絕隣人窺
之見其祖母掖之出旣長刻意尙行克養深邃無遠近率以

張八爺稱之明末歲饑傾資周卹養瘠瘞殍義聲大著劇賊老獍獍攻破諸堡標其門曰犯張八爺者死他堡來依賴以全活明亡不仕益勵學行當事者慕名造謁輒引避家居教授成就尤夥高蹈幾二十年走卒婦孺無不知其名者相傳羣小夜過其園竊食萊菔一曰不畏其知耶一曰此張八爺園知亦不責後有竊食他處蔬菓者輒相嘲曰此豈張八爺園耶前令郭公傳芳奠其墓樹碑流曲鎮東門曰高士前孝廉愚齋張先生故里

趙述字述古順治辛丑進士父文耀家貧力學弱冠入庠事親孝教子有方長卽述次遇亦食餼於庠述通籍後觀政刑

部旋授山東蒲臺令時

國家定鼎之初民間瘡痍尙多述勞來安集勤於撫綏數年間戶口倍增循績茂著

宋爾和字釋之一字行生而敏幹性嗜學家故酷貧里人石哈行愛其才資給無倦色釋之學稍弛或小過誤輒極口詆呵釋之奉若嚴師明末寇亂偕隱某山

本朝靖逆張侯勇聞釋之名以卑禮迎入軍幕一見大奇之委以腹心軍中事無大小悉取決釋之謀無遺策發必奇中佐侯屢奏膚功受上賞歲酬不下數千金旣輦積歲所獲爲哈行壽哈行笑不納力勸其歸釋之哈行皆不娶故歸卽迎哈

行同室居金幣盈室中縱橫填委有以緩急告者無親疎聽以己意自取用久之哈行復勸歸隱遂偕入華山不知所終哈行志節尤奇隱傭保中強敏趨事不計值有終歲服勤不受一錢者少暇攜畚鍬行陌上拾諸獸物滿則隨意壅壠苗迄不問誰氏田時出已夙所獲傭值悉周貧乏於釋之尤極力供給成其學行哈行名可思里稱哈行先生哈行語不可解蒲城楊本涵以爲夷然不屑意

按釋之哈行一代奇人傳其事者互有異同俞蔭甫太史以哈行事作五奇傳

王汝德順治初授金華主簿時值閩寇甫平屍骸遍野躬督

夫役捐棺木廣爲掩埋悉免暴露招撫流亡數萬家俾各復業旣而簿裁以保薦留陞永康丞潔己愛民永人至今感之何曰浩字志海號四周明學生遭闖寇叛逆辭文廟焚衣冠衣白紵終身不易家貧甚了不介意闢園名五柳築此君臺日率童蒙吟唔其間暇輒淪茗理琴嘯咏自得事親敬養委至親歿致毀三年不見齒祭必虔後以遵例舉隱逸前令某公折柬相邀答詩有勸君休下陳蕃榻不是商山四皓人之句迄不赴著有詩文若干卷

喬維華字峙伯父若櫛明末歲貢有學行游其門者多所成就闖寇據關中脅之仕以死拒之惟華傳父業尤邃於理以

名士舉制科兩試皆俛得復失遂棄去教授生徒以人倫爲己任執親喪哀毀三年如一日先是奉父偕隱曲盡色養

國初澄淑官方走檄命縣官敦促其父堅辭不起遂與維華皆終身韋素爲盛世逸民云

孟孔脈字祖尼順治乙酉舉人授稷山令聽斷明允邑無冤抑嘗割俸贖民鬻子百餘人富邑陰家河病涉捐資築石橋以濟行旅又築堡寨聯守望爲族人代完逋賦里黨賴之事詳通志

魏象廕字明陽順治乙酉舉人授良鄉令明季兵燹後良民彫敝而地屬畿輔差驛惟繁公私疲困廕力白上憲委曲調

劑民賴以蘇又以學宮茂草業儒者少首葺文廟兼立義塾
延師啟訓文風丕振俊造成林邑人感而祠之既陞順德通
判辭不就里居義舉尤多詳載邑人李太史因篤記中

何翊漢字建順順治丙戌舉人授江都令剔弊決獄衆號神
君值海寇侵疆民散獨從郡守登埤死守城賴以完丁父艱
歸年甫強仕以養弗逮親不復起

范應侯字次公順治丙戌舉人授費縣知縣潔己惠民三年
告歸環堵蕭然無加於始前令鄭崑璧表其門曰一代偉人
韓文字斗山順治丙戌舉人文安知縣陞濱州知州博學能
文繼恭介公著富平志稿未刊

陳正己忠心弟順治戊子舉人初知成安縣遷大興俱有循績歸田後立義塾置學田提學淝水許公旌以文正遺徽邑令雲中郭公以仁里義學榜諸門又創修水澤聖母祠表里社正祠焉

楊紹武字式穀號悔堂忠介公六世孫順治己丑進士授永嘉知縣瀕海巖疆民疲吏玩豪滑橫肆武下車抑強字弱新政可觀時有妖僧交通上官大倡邪教紹武招諭僧倚勢抗凌遂予杖致斃上官惡其異已旋以輕視國課奏罷之歸里後授徒講藝富蒲宜君白水登甲乙科者多出其門著有鐵舟意草等集行世

魏自祿號西侯少從軍遼陽順治十八年委補沂鎮千總屢著戰功陞授重慶守備未幾吳逆寇蜀祿誓不降賊將數騎入閩歸康親王爲前部討平海寇吳化等初授惠安叅將旋署都督同知封榮祿大夫推陞成都副總兵以年老致仕歸紀廷樞字均宰由行伍從征川東勦除西戎積軍功歷官榆林守備屯守達爾免引雪山水灌田軍民爲立生祠名其旁橋曰紀公橋屯田十八年授固原遊擊推慶陽協康熙辛丑關輔饑寇盜嘯聚盛山苜蓿溝號數萬屢攻不下鄂制憲檄樞進勦不旬日蕩平嗣以驃騎將軍告老初樞屯守達爾免日嘗手縛酋領一人將剗刃遂受約束無敢侵犯我邊陲議

者擬諸傅介子云歸田後俸餘盡周親族與童僕共力作善
事兄長人尤稱之子二長實許進士任南雄守備次仕許官
典史

仇延社字名先號天庠孝子仇養蒙曾孫康熙癸卯舉人任
鳳翔教諭值軍興憲檄代催軍需力卻私饋民感之壬申大
荒嫻友就食學署者供給無倦色

朱樹滋字長源號迂菴廷璟子生而岐嶷十歲知書以諸生
入成均爲司成王阮亭先生所拔識與同邑李太史子德姑
蘇顧寧人太原傳青主二徵君相友善詩古文詞皆絕人遠
甚居家崇孝友居鄉宏施濟尤見推獎著有留雪齋諸稿藏

於家

唐作肅字雨休生而岐嶷太原傅徵君青主一見奇之決其
大成年十三值母病日侍湯藥夜處母榻下中濕成瘵迄不
痊然力疾向學以博淹著詩文皆絕人執贄請業經其指授
者皆成名下士樊元助趙廷健王吉士等各魁一經盧重吉
等二十二人有聲庠序英才濟濟輝映門牆識者頗欲擬諸
河汾孝友慈祥尤爲鄉里所推重云

竇希韓字獻思監生性孝友慷慨渾厚事繼母能得歡心與
異母弟監生希范處友愛如同胞教子有方敬禮師席一出
至誠尤樂拯人之急晚年貧窘見喪未舉婚未完者猶汲汲

搜篋解衣濟之至今鄉黨稱道弗衰

陳廣運字右忱庠生開虞曾孫少有至性嘗失愛於繼母委曲承順母愛之無異己出遇弟廣業友愛有加生平待人恕律己嚴里中知名士多出其門

楊啟聰字聖一丙子解元性孝友績學不倦每遇歉歲出粟賑濟動以數百石鄉里頌之子某貢生遵遺命亦樂施不倦孫公寬庠生性廉退讀書好伊川語錄摘取成編又嘗還拾遺讓兄產歿後鄉里以芳行碑其墓

儒學

金

惠元鈞少聰慧貫通百家屬詞敏贍以文名

元

唐瑩某科進士博極羣書抱負宏巨後進行藝優長者極力
獎誘學者宗之稱犀峯先生

明

曹汝葵字子雲嘉靖丁酉舉人祖清庠生仕太醫院判加俸
世襲父思讓以茂才仕清海教授耀州派累萬民思讓偕陳
睿王增伏闕奏告得免汝葵篤志向學少時讀書山寺六年
不窺戶弱冠舉於鄉爲主司鄭端簡公所拔旣授慶符知縣
旋改蒙陰所至吏民畏懷歸結里社獎引後進學者稱南谷

先生書仿顏楷得其神著有南谷前後集二十卷子五人並以文學擅名長子煌尤尙實踐萬厯中爲關山書院山長亦善書法

曹汝菊字子逸汝葵兄弟並有文名人稱雙鳳束髮入庠試輒冠軍嘉靖辛卯舉於鄉授平遙知縣陞襄陽府通判今襄陽有曹山爲遺愛碑處致政後年甫四旬與兄互相切劘學殖益進書仿顏柳兼善章草著有見山堂草

劉士龍字雨化萬厯癸卯解元嗜古博學工詩古文詞名噪海內學士宗之所著有藿議狂言醒言韻記韻語月令香律醉溪齋三刻信腕草碎壺集落花詩終南遊草池陽大會草

諸書藿議言關經濟尤可傳述士龍少讀書於盤龍寺已隱然見風度後賊擾關中士龍約三原耀州同志練鄉兵爲犄角截擊法上之當道建禦守策城鄉賴以保全者不少至今人猶稱道之

韓容字雙台貢士高隱不出日以孝義孝弟訓鄉里初與楊忠介公同筆硯楊表其閭曰鳳翔千仞又贈詩有關中高士韓雙台之句子孫曾元列贊序者四十餘人

何顯瑞天啟甲子舉人任陝州學正和平坦易嗜古能詩後知靈寶縣值闖寇入河南顯瑞力拒不克後歸里自成逼授以官逃去子曰浩亦棄諸生隱居自有傳

本朝

程鳳儀字虞包明季庠生究心理學與李二曲雪木兩先生游著周易合象周易解中論弟經等書宋釋之爾和嘗師之子文錚由庠入監考州同職有詩名

孫萃字萬紫明季諸生篤行力學教授生徒所交皆一時碩彥同邑唐含章喬峙伯紫垣諸先生江南高宗礪介公尤稱神契著作甚富多爲及門傳覽散佚玉京夢衍義二卷已粹沈起潛字逢禧歲貢詩文書畫名一時尤留心經濟著富平圖設開三尺嶺議北沈韻陝西地圖頻陽山川圖石刻現存曹玉珂號陸海順治己亥進士生而穎異授書一過輒不忘

下筆千言立就初授壽張知縣政尙廉平

名擢中書舍人卒於官棺衾不具王又旦哭以詩曰家無舊業
留京兆世有君才止舍人玉珂詩古文詞皆名家新城王阮
亭穎川劉公勇同邑李子德諸公罔不推爲一代作者著有
緩齋初集大河志史論事論雜詩已刊行其緩齋二集終華
仙蹟志祥刑錄左國史漢臆評諸書藏於家孫秉仁由教諭
改江夏丞累官至寧波知府

田而穊字秩臣號漆厓父時暘明末以諸生入太學累授重
慶府太原衛經歷所至有善政予告歸濟荒周貧恩覃里族
生穊時有異兆旣長學成順治庚子舉於鄉久之授固原學

正調岷州衛學正卒於官穉性孝友剛正不阿動必以禮兩
試學博先行後文提覺有方同官上司皆深加齒遇謂爲當
世古人所著有懷山堂文集六卷詩集十四卷詩餘三卷經
史隨筆六卷五行經子午鍼三卷程典註二卷田氏家乘二
卷驚枕錄二卷傳章七程以貧故不能梓姪甚衍性剛方博
學強識著有同心軒詩十卷文集六卷正字錄二卷
李因篤字天生號子德八歲能文章年十一入庠值明末寇
亂棄去肆力古文詞尤長於詩康熙十七年

詔集諸儒纂修明史廷臣疏薦之以母老乞罷不允十八年

御試授翰林院檢討未兩月卽疏乞終養疏畧曰臣母年踰七旬

屬歲多病隨經具呈吏部吏部謂稱親援病恐有推諉竊思
已病或可僞言親老豈可假托臣雖極愚不肖詎忍藉口所
生指爲推卸之端臣仰圖報

君俯迫諭母欲留不可欲去未能瞻望

闕廷進退維谷疏三十七上始允歸抵家後寢食湯藥每事躬親
越五年母歿不復仕性敏絕博極羣書又好汲引後學問字
者無虛刻或有過必婉詞規勉未嘗以聲色加人崑山顧徵
君炎武嘗集杜句題贈云文章來國士忠厚與鄉人蓋實錄
也卒日里謚文學先生著有文集三十五卷評漢詩十卷邑
人故樂昌令田若琬鑄以行世弟因材性孝友著耦園集姓

氏攷

成言字默之號鹵川事母至孝每定省值母閣戶於窗前肅
揖頭必至地貧而有守恥干人師事李二曲先生以聖賢自
期待勸善規過力持風教二曲歿服心喪三年丁酉歲講學
涇川官士服教者三十餘人前令楊公勤踵門投後學刺聆
教益如嚴師著有太易四書易簡成氏家訓及一貫圖

喬爾斗號漆濱有志節隱居教養耄而好學言理恪遵洛閩
文喜韓柳李二曲先生以貧而無諂目之桐城方閣學靈臯
昆仲慕其名嘗寄書訂盟稱神交門人登賢書者三人入庠
尤夥所著有博約說孔顏所樂論四書辯難及諸雜文惜罹

回祿僅十一

竇人龍字仲永號默齋賦性純明不慕榮利少習舉子業旋棄去潛心理學肆力經史李二曲先生一見許之曰厚重沉潛可與入道授徒百餘人以先行後文爲宗事親曲盡子職父病禱天嘗糞旣沒廬墓三年事長兄如父兄沒粵東官署值兵亂道梗人龍冒險迎歸事孀嫂加敬慎比歿殮葬如禮處里黨言不妄發一介不苟取終身不入公門前令郭公傳芳慕其爲人欲一晤力辭不赴乃造廬就見匾其門曰理學名儒

許襄字贊公康熙甲子舉人恬淡寡營守正不阿楷範來學

章縫著美士論推爲宿老

惠靈嗣天性至孝文學優長康熙辛未進士授通海知縣善政多端上憲咸引重莅仕八月卒於官著有自新應用二錄

楊名時李二曲同邑李太史子德咸爲立傳載家乘

李樾字旬永祖春先以諸生入太學性孝友樂施予律己方嚴接人寬恕友人某旣絕交遭奇禍潛髡其女託之善遇如己出父濟順治戊子舉人任惠來永城二縣令有能聲樾中康熙己卯舉人雍正四年部選贛皇知縣引

見日以耳聾自請改教職

世宗憲皇帝嘉其忠誠不欺特加錄用莅任未幾致仕歸樾學殖

深厚教澤所及克自成立者指不勝屈士夫稱之其伯父澤東平同知弟棫以進士任永定知縣各有政績弟樟有傳周懋康字甯人高隱不仕長於詩以邑人李太史子德爲宗王阮亭孔東塘兩先生極力推之有一代風雅之目

韋編字續之讀書太乙石室精于易著序卦圖解及苦槐堂集稿藏家

袁大選字聖舉戊子舉人任馬邑左雲兩縣令有惠政里居授徒成就多人著世範堂詩恕菴文稿藏於家

楊深字通志五歲失怙恃育于伯父伯父歿無子身爲三年喪嗣以次子族黨稱焉深敦行嗜學有聲幕府著春秋臆說

萍踪雜記樂耕園詩草暨南湖志等書稿藏於家

張若敏字學山丙辰舉人由明通官中衛教諭衡文課士勤於職上憲廉其才識委協辦軍需嗣以績最卓薦授青溪令未之任卒於京邸

何格字舜典州同知有孝行學品爲時所重依幕府數十年藩臬督撫咸委資焉居鄉矜式閭里

友悌

本朝

陳廣業字淑勤壬子舉人由明通教諭華陰諄切課士撫憲盧公手書不愛錢三字以贈緣母老告終養後捷取劉陽令

旋改授徽縣諭訓課如華倡立粥會濟饑尤藉甚人口三代
縣篆設施頗多歿於官士民哭送者塞道路業性孝友與異
母兄廣運處雍雍愛敬老而彌篤

韓文星一十二世同居共爨八十一人恪守先訓外著雍睦
內敦孝友乾隆十六年知縣李世垣詳報陳大中丞題准奉
旨建坊忠孝祠立碑題名

周挺壽民兄弟五人三兄一弟俱先後歿竭力事親尤善事
孀嫂又爲堂叔嬸營喪葬撫孤成立殯鄰邑友人已地人稱
盛德

仇懃仇恮仇懽兄弟友善而恮繼叔氏後不計分產後以歲

貢佐蓮幕尤不妄取予飭躬勵俗見重鄉黨里人稱有家法者咸推仇氏云

義行

唐

古押衙邑多古姓或云卽押衙後李太史因篤云薛市有押衙洪隱居遺跡數處

本朝

顧振翮耆民自其父濟公以來已有好善樂施之稱翮性孝友克承父志每遇歉歲出粟賑濟族有幼孤二收養於家授室置產他如修橋梁平道路施棺瘞骸義舉甚多前令德州

李公長洲顧公長白興公並先後旌其門

石廷瑚庚寅舉人家素封刻苦力學自甘儉樸鄉舉後捐備
飲食紙筆聚生童常數十人會文淡村寺中月六舉仍延名
宿分校成就頗多邑庠董之用贈詩有云袖將題至星初落
收得文歸日已沉一時傳爲實錄瑚性孝友嘗爲再從兄廷
瑜成室生子瑜歿撫恤孀孤人尤稱之

石爲崑監生孝友慈祥處家處鄉無涼德手錄古人格言標
爲家訓歲饑出粟八十餘石濟衆里人以麥舟遺範表其門
成自孔自其高祖來相勉以和子孫恪遵先訓耕讀孝友式
好無尤現男四十人女四十二口同居八世里中稱義門

石天魏監生七世同居現男女八十餘人耕讀傳家孝慈友
恭內外從無異言

耆德

明

楊之翰字清宇崇禎甲戌會副授夏津令仁厚廉明未嘗輕
笞一人行法輒垂泣民愛如父母後掛冠歸自號逸叟年九
十三卒德政文章膾炙人口

路立孔字東山天才英邁嗜古工詩不樂仕進嘗遊朔方與
高僧靈芝爲方外友趙忠襄公延爲上客未幾旋里偕同里
魏季始讀書明月山寺老而彌篤著作甚富有春草堂遺草

行世

王錦字子襄歲貢兄弟析居時嘗推產讓業任安定訓導勤於課士少工圖章隸篆解組後年八十餘猶爲人鐫寫不倦時人重其手蹟

武克謹字慎一庠生家貧力學持品端嚴課授生徒勤而有方遠邇爭延致之成就頗多邑舉人張若敏王吉士竇鳳輝貢生張若愚庠生翟象滋馬克莊楊振威等十數人並有名一時皆門牆士也至今邑中授徒者皆推爲前輩典型云

趙有徽字虞典貢生幼喪母哀毀如成人事繼母孝弟武生有值夫妻相繼亡遺孤僅數月並幼女四攜歸撫育嫁娶成

富平縣志卷五
立居家儉素而好周恤扶老濟困無吝色教子孫有方子繪
食餼於庠孫夢麟鄉舉現以試用縣任潮府經歷

楊齊碧庠生精岐黃術尤邃於易著易經遵註壽百有二歲
唐澤鳳恤孤憐貧姻族中老而無依少失怙恃者恆依賴之
子溥德溥忠並列膠庠孫邦彥早歲膺鄉薦人以爲盛德報
云

李文典處士庠生中選父嗜學篤行孝友重鄉里課子有方
外孫進士党新綬諸生新綬並沐教澤居恆手一編皆理學
書人以古先生目之

党起孟字鴻儒孝友任恤鄉里稱之

舊志載其懿行可傳者如前明貢生任儒倚師中庠生張鏞
省祭曹思明民人李盡心李時茂田而成等之孝事父母

主簿蓋廷章庠生仇陵楊棟田潛儒士王胥諷民人董彥章
劉普好潘龍周舉賈良劉振高等之親歿廬墓 省祭張道

治吏員張然民人唐順王尙賢竇良棟等之割股奉親 通

判孟國詔庠生張養正廬墓三年又祠祀三年 仇同張彥

山皆賣菜傭能竭力奉養與妻孥同啖糟糠 李盡心趙孟

良劉孟豸孫綱孟天嗣等之友於兄弟 民人王肅周肅魏

廣膚施田自新魏大倫李梅李宗橋等之任郵鄉里 庠生

劉必通民人喬秦崗於明末賑濟同出粟一千四百石必通

復代供闔里夫役銀百兩其子庠生可繹亦樂解推 張紘
田稔田深劉瑤劉朝陽宋經王臣等之隱德 七歲善書彭
佐商之幼穎

本朝廩生惠君美處士喬冲斗民人紀文碧劉尙義温克振等
之孝友兼至 孟國脈許塘魏人紀馬光明武尙謙楊琳等
之善事父母 生員魏漁劉儼等之善事父 紀炳政李春
盛等之善事母 典史魏之琦民人楊清等之善事繼母
楊述烈邵振有等之親歿廬墓 曹騰翼楊永寧曹承健等
之割股療親 生員班璉民人袁月望李允寧等之居喪盡
禮 貢生孫長階孫長陶孫長隆等之兄弟友愛 王璞王

魏光輝魏昌蘭魏廷瑞魏日恭之善事兄長 魏魁芳之撫

姪如子

劉永承之推讓產業

張徽典唐加廣韓文起劉

起本王義民康永衛程玉珂趙思明趙有循胡克聰吏員張
大智王祉榮等之孝友樂施 巡檢張養蘊監生楊勦楊勤

民人雷爾澤雷中辰楊標石璫楊慎行張繼梁仇嗣馨陳自
評楊之玥魏詩賓孫維天田作霖馬自蕃監生趙希獻鄉飲

大賓張雍睦耆賓劉元坤民人權統眾等之任卹而趙之信
好善樂施焚券煮粥庠生紀釗典房耀粟以賑庠生李廷薦
授徒三原出館金耀毅捐賑人尤稱之 支起都魏承烈陳

其蘊韓文仕張新發喬生祥王天福田思問等之不昧遺金

胡崇祿業薤頭竭力養親人稱胡孝子張繩武年逾七旬繩宗六旬餘兄弟友愛老而益篤王子耀爲王天祿義子事親撫姪出於至誠韓二爲人傭工拾遺金訪還失者不受謝尤屬難能庠生宋振唐党懋醇王在簡許上達處士沈肅等之學品邑人李一龍貢生劉琬門人等之視師如親凡皆懿行可傳者也

方技

唐

田真人碑失名田村人世傳修煉美原縣東郭曉服食變化術邑人曹玉珂終華仙蹟志載田常在事甚幻或云卽其人

徐七夫名幼好道棗家遍訪名山歸而習靜華之青柯坪一日見異人登山徐敬禮之問徐家何所對以富平因自云訪道未遇其人笑曰道在汝鄉何遠求徐駭問復曰西女學洞有養生經一卷斯道要也徐領之旋歸入洞見積書滿几首一冊卽養生經一石人憑几如觀書狀諦視卽向所遇人徐驚拜取經出寫畢還送洞中依經練習年逾耄耄仍遊名山不知所終

金

白德明字顯達美原人母黨氏夢白鳳棲庭而生幼穎悟善屬文父獻進士爲縣令德明見其鞅掌拘攣狀力諫去官自

亦絕意婚宦棄家爲道士居三原龍陽宮復厭喧囂遁跡華山元世祖召入奏對稱旨賜號天光真人

元

志達碑夫名元初見女人化蟒遂發願學長生術後遇正陽授秘訣棄家學之居抱一觀年百餘歲顏如童子

明

邱元清邑人少慕仙棄家訪道至武當師一道流虐使之迄無忿恚從遊諸名山最後抵終南至山巔有敗屋三楹師曰此吾初學道處命拾薪煮簷下白石食之謂元清曰汝留此吾暫過山下訪故人遂去不復返林冥風淒虎蛇交跡饑欲

煮石苦無薪自分必死僵臥室中見牆頭殘書數卷委積塵
中取視則皆要道因雜誦數日豁然有悟而師適至笑曰汝
見吾書乎可言其義元清因敷陳請質師大喜再爲開示遂
了真訣乃引至一處貝闕珠樓迥出塵界謁諸道侶始知其
師爲張仙三丰旋命卻歸武當文皇時求三丰不得名元清
奏對契宸衷拜御史遷太常少卿賜以宮女固辭不受未幾
棄官入終南不知所終

趙老無名字或云宋宗室初隱終南悟徹禪宗天順間選地
富平居明月山峪二虎依之以藥濟人得者立愈有相邀者
騎虎往常有偈曰明月清風好坐禪休將意馬走山川此生

不修空歸去再遇人身幾萬年示寂後肉身尙存在石峪中
人遂呼其峪爲趙老峪邑人李翰檢因篤云趙與孫真人同
居一菴

馬官兒無名氏不言其籍語則操秦音萬厯初居邑南郭喜
與乞丐小兒相嬉遊人呼官兒小而賤之也諸生曹數飯之
復館之別墅嘗語曹以黃白術曹不納又自言己百餘歲亦
不之信一日曹母眉際生疔勢甚危羣醫束手視馬笑曰易
耳出葫蘆中藥三釐敷之立愈無何曹門人張某家僮詣曹
假一僕同治喪具云其主疔生於眉當來時已屬續矣曹俾
以騎迎馬往比至菴菴氣欲盡馬入視遽曰可速作粥候病

者食又不卽敷藥顧左右具茶從容飲畢姑出藥如前許敷之未移時病者忽起呼曰飢甚亟奉粥盡數器疾脫然如失去因出百金爲壽卽持去呼貧者給之立盡久之辭曹去叩所適曰予自終南來還自終南去向曹作禮曰公旣不屑黃白術復不祈久視請以一方贈公蓋卽前所爲以治瘡者去時留偈於壁曰回光返照清修真要妄念能斷神氣不散氣海朝暉長生之門南山幽幽期君來遊

程化樂都村人自云化樂真人謫人世故以爲名應童子試久不售遂棄去習靜華山華涓人尊奉之如圖南著作甚富言未來事多奇驗歿數年有於蜀中遇之者傳言謝故人蓋

尸解也

劉仙隱石疊山洞門題碧雲島洞前石砌山田數畝相傳仙人種藥處詩云青山不管人憔悴綠水何曾洗是非人來問我紅塵事擺手搖頭總不知

本朝

程雲漢宋釋之師幼好睡或數日不醒經書未授讀輒能暗誦詩文下筆立就著三元經數千言雲遊方外屢現靈異門人寧遠令宋萬勝有傳

流寓

唐

魏徵字元城曲城人少有大志高祖時官洗馬輔隱太子太子敗秦王責之徵曰太子早從徵言無今日禍王器之比卽位拜諫議大夫徵感知遇封事先後二百餘上皆剴切當帝心三年與朝政七年封鄭公卒之日帝哭臨輟朝五日贈司空諡曰文貞今縣北有徵廟碑載其世系甚詳廟左鵝鴨池底堅如石南一里祖墓在焉

令狐彰字伯陽父潁范陽尉自燉煌遷富平彰倜儻有膽氣涉獵書傳知大義初事安祿山史思明僞署滑州刺史感激忠義思立名節募勇士善水者表請歸順肅宗大悅賜書慰勞乃自滑臺移鎮杏園率死士數百人潰圍入朝下詔褒美

賜甲第帷帳什器甚盛拜博滑節度使河朔平加御史大夫封霍國公時吐蕃內犯詔彰防之所過秋毫不犯病亟勒子歸東都私第悉上軍府兵仗財用簿仍薦劉晏李勉可當大事代宗詔褒其閭贈大傅長子建管右武軍事遷右領軍大將軍次子通以李吉甫薦拜贊善大夫徙秦州團練使終右衛大將軍三子運東都留守將父子兄弟皆以才名

李光弼柳城人剛毅深沉負雄略善騎射用兵謀而後戰能以少覆衆治師嚴整天下服其威名軍中指顧諸將不敢仰視與郭子儀齊名世稱郭李卒贈工部尚書諡武穆今墓碑在富平西北原上顏真卿書蓋其遷寓地云

李光進字大應光弼弟初爲房瑄裨將代宗初拜檢校太子太保封涼國公吐蕃入寇至便橋郭子儀爲副元帥光進及郭英乂佐之又掌禁兵後出爲渭北邠寧節度使

賈島字闌仙范陽人初爲浮屠名無本遊東都洛陽令禁僧午后出因作詩自傷韓愈見而憐之教爲進士業遂苦志吟哦以詩名世後坐飛語貶長江主簿久之以普州司倉叅軍遷司戶未受命卒歸葬賈村塚碑今存蓋寄寓地

金

李興曲阜人遷到賢里居焉初以異材累官大將軍耀州刺史屢立戰功賜玉兔鶻帶金器已又加輔國上將軍渭北總

帥元兵入關三輔大震特命行省陝西興遂據天活堡百姓
依之全活甚眾卒葬永閏鄉子魯孫耀州刺史

烏古論速可爲鎮耀將軍元兵入棄官隱富之北山遂家焉
今流曲李氏其裔也里東有速可墓人稱元帥墳目其子孫
曰金碑李家

明

胡致中初籍汾州官陝西右布政使有治績旣而棄官家於
富居廓廂里

本朝

蘭泗耀州人寓富平由將材授湖廣興國叅將康熙十二年

陞直隸三屯營副將未莅任因吳逆犯長沙調駐武昌十三年進剿岳州又檄討黃金龍戰於大冶之換繩橋殲賊殆盡獲馬贏器械無算軍威大震十四年還鎮武昌兼攝通協事十八年特擢荆左路總兵時逆黨未靖泗旌麾所指屢建奇功克思南復龍泉遵義綏陽桐梓等處一時蕩平改鎮安籠地界滇粵巨寇窟穴其中最稱險要泗安內撫外四境帖然在鎮十有六年

予告歸在官數蒙

溫諭前後

賜書籍緞紬蟒掛盔甲鞍馬等物夫人唐氏幼以孝聞歸蘭相夫

教子俱有法三旬稱未亡人以霜節見稱

馮天鬻紹興人寓由家堡高士馮亮子貧不能娶僱身供親色養無間遠近人咸敬之稱馮孝子

張占鰲洛川人子超卜居富邑東屏堡遂爲富人康熙中任荊州府通判時西山寇發占鰲嚴保甲飭門禁巡邊疆練鄉兵四境無虞大兵駐荆軍需支應悉中條理督催江陵等五邑漕米清弊平收不累民旣而大兵進剿奉委運餉七連坪寇至不避勒降不屈遂遇害事聞

賜葬祭贈按察使司僉事廕一子

李顒字中孚盩厔人以理學名學者稱二曲先生康熙十四

年以避兵氛流寓富平閉關養病不與世通惟三五舊遊時
叩起居有問必答語皆洞源邑人惠寵嗣爲顯高足輯富平
問答載二曲集又邑令郭公傳芳築室幽阿迎顯居之欽聆
訓誨五載西歸

張超字孟遷號特生占鰲子由難廕授宜陽令莅任五載勤
講

聖諭表揚節孝嚴禁私派開導水利大著循聲至修文廟立義學
施粥賑饑率捐俸爲之他若祝蝗蝗絕禱雨雨降民尤咤爲
異政陞西隆知州因地敷政多所興革遐壤殊俗熙然丕變
未幾卒於官州民哀號如喪所生櫬歸過宜陽宜陽民罷市

富平縣志卷五
哭送如去任時又就舊所立祠哭奠之旋請從祀名宦子崇
禮己卯膺鄉薦宜民於祠前揭二旗書長發其祥以志良吏
之報

蘭孫盛字衍宗州同職安籠總鎮泗次子事父母能孝謹飭
篤學兩膺鄉飲大賓前令喬贈詩有一門高月旦多士仰丰
儀之句著香祖樓詩稿藏於家子坦耀州拔貢生

張正德字信伯四川夔州府奉節縣人由行伍從征瞻對積
軍功累官富平營都司署延安叅將歿於官子廣宗以遺命
奉母氏汪家富平籍溫泉里

王天秀耆民其先三原人事孀母孝友愛弟姪周恤鄉族至

念已幼時因貧失學家稍裕乃於原籍捐置學田尤近今之不多有者



不勝枚舉
...

...


富平縣志稿補遺

忠節

程麟石川里人富平營高陵汛守兵乾隆三十八年從征金川陣亡

毛諱秀義城里人富平營永豐汛守兵乾隆三十八年從陣金川傷亡並邀

恩卹銀五十兩



金川

平陽

日南

通鑑曰：其人... 二十八...

忠節

清平